

Kyra Hoevertsz hunto cu su ekipo ta logra gana ORO y ta clasifica pa e Junior National Championships di synchro na Merca

ORANJESTAD, 22 maart 2014. Ya ta mas cu un aña cu e hoben atleta di e deporte di landamento sincronisa, Kyra Hoevertsz, a establece su mes na California, pa eynan continua su estudio y tambe desaroya su mes den su deporte como miembro di e club Walnut Creek Aquanuts.

Siman pasa e ekipo completo a participa na e “West Zone Junior Championship” na Mesa, Arizona, caminda cu nan mester a logra supera e puntuacion di 73 punto pa por a gana e derecho di participa na e campeonato nacional di Merca cu ekipo den e categoria “junior”, cu ta di 14 te cu 18 aña di edad.

Diabierna durante e “West Zone Junior Championships” a toca e prome mita di e competencia, esta den e figuranan tecnico, y tabata tin no menos cu 119 participante. Figuranan tecnico ta un di e fortaleza nan di Kyra y e tabata tin confianza cu esaki lo a bay bon. Como e unico landadora no procedente di Merca, Kyra a logra un puntuacion total cu a posicion’e na di 8 puesto entre e 119 landadonan, lagando pues un tremendo impresion atras.

Diadomingo a tuma luga e competencia cu ta e rutina riba musica. Cu un presentacion tremendo di e ekipo di “Walnut Creek Aquanuts” a impresionar e

huesnan y na final di e presentacion, e puntuacion a wordo presenta: 82.500 punto! Mas cu suficiente punto di loke nan mester a alcanza pa por a clasifica pa e campeonato nacional! Fuera di esey nan a gana Medaya di Oro!! Cu un cara di alegria, Kyra hunto cu su team tawata masha contento mes, nan a logra nan meta!

Bista awor ta cambia pa e Campeonato Nacional Junior di Merca, cu ta tuma luga na Oro Valley, Arizona, den luna di april. Eynan Kyra ta competi cu su club Walnut Creek Aquanuts den e evento di ekipo y tambe den e evento di Combo. E aña aki Kyra no ta preparando pa competi cu solo, ya cu e ta



den un programa di preparacion pa bay competi cu su Duet Partner di Aruba esta Anouk Eman den e luna nan juni, juli y augustus representando Aruba den diferente competencianan.

Tur esaki pa haci un preparacion pa e Weganan CAC cu lo tuma luga na luna di November na Vera Cruz, Mexico, y na unda Kyra hunto cu Anouk lo representa Aruba.